

四庫全書

集部

欽定四庫全書

集部

五百家播芳大全文粹卷

四十九  
五十

詳校官編修臣謝振定

助教臣常循覆勘

總校官編修臣王燕緒

校對官中書臣李荃

謄錄監生臣梁徵

欽定四庫全書

五百家播芳大全文粹卷四十九

宋 魏齊賢

葉 棻 同輯

通啟

通易尚書啟

朱湛廬

候長沙之星慙叨分閭望尚書之斗喜在鳴珂已脂轄  
以首塗亟擘牋而抒敬恭惟某官輪囷奧識絢爛高文

紅錦賜袍登仙仗鸞坡之上紫荷持橐在屬車豹尾之中  
頤頤飛霞簸弄明月方欲作郊祀之歌以粉飾禮樂抑且規  
帝王之制而裁成典墳忽觀滄海之浮雲盡付黃梁于昨夢  
詩書之教鵠舌天令變于姬姬吟詠之落鳥蠻人競傳于欵  
乃騎鯨過去跨鶴俄還竊惟平生討論述作之工實得前日寂  
寞寬閒之力崑崙碣石細箋禹貢之山川鄉遂井田增釋周官  
之制度已驤騰于紙價頗傳習于經生向使黃扉紫闥而益顯  
其身安得玉

佩瓊琚以大為不朽殆天心之有屬豈世俗之所能知  
舒卷隨時寧久篋中之團扇論思有詔即還坐上之青  
瑣某猥以庸才荐膺重寄繼常侍湖南之詠自顧非才  
聽任公戶下之規願安承教

通王侍郎啟

王邁

少而抱輟久瞻魁宿于璇霄壯也彈冠行覩德星于珂  
里雖素于左右殊無介紹然見之方冊不昧平生敬飭  
訥詞僭于嚴分恭惟某官任重而道之遠表粹而裏則

剛方在韋布之時已負搢紳之望碧雲章句號閬苑之  
謫仙黃甲科名叶湘川之佳識別蠹芸館含香錦圍翠  
節朱幡幾沛黍苗之雨紫薇紅藥曾依香案之雲方為  
禁從以小智乃壓神明而丐去十連為帥方蘇凋瘵之  
氓五嶺皆炎變作清涼之境胡然為衆所忌正坐其名  
太高一壑未歸六丁莫挽髮為憂邊而半白心思報國  
以常丹冠公不入中書莫答璫球之問裴相方游綠野  
其如柱石之衰佇下綸音徑思國柄伏念某弱惟殖學

貧只賣文固嘗感慨于事功其奈關心于場屋天庭對  
策妄陳憂國之孤忠末第書名何惜避人之三舍來傍  
蓮池而漫仕已驚瓜戍之過期胡遲其來蓋恐素官之  
無譜或贊其決以有達尊之可師惟顧矜憐臭味之同  
庶有終始帡幪之託俾遂親養得遑官箴揚儀之無材  
力之可稱正深廩廩宓子賤待老成而後決尤切拳拳

通周太尉啟

洪景伯

近長安之日記陪天上之游對江東之雲健想軍中之

樂無從抵掌祇有傾心恭惟某官氣稟西山聲搖赤壁  
號萬人之敵名在伏波翰墨之場當八面之鋒勇過晏子  
樽俎之畧中國噤吸之既固外夷心膽之既寒況以真  
將軍堅壁之餘風而奉太夫人安輿之一笑忠孝兩盡  
若是艱哉文武兼資特其細爾功既高于敵愾當未稱  
于酬勞撫中權于天塹之陽懷遠笑于祁連之北雖講  
止戈之武不忘擊楫之心江漢草木之知名坐底三邊  
之靜山河帶礪之申誓亟膺兩鎮之勞某榆莢生涯菊

花歸夢月明鵲繞每思賡橫槊之詩秋高馬肥敢後寄  
加餐之字

通待制辛帥啟

林豈塵

疇庸北固易鎮南昌棠舍陰濃頓改江山之舊松階望峻  
載觀戟燄之新先聲鼎來闔郡欲舞顧趨承于秉屬尤  
感發于私衷蓋謂自三光五岳之氣分嘆英豪其有幾  
更四聖百年之治足慨功業之良難早聆季子之來歸  
衆喜夷吾之復見使表餌得行其策則規恢豈俟于今

方期父老之椎牛開闢持勞豈謂兒童之竹馬夾道俟  
迎抑九重深軫于此方乃三錫重勤于老手恭惟某官  
蓄雄剛之至德負卓越之奇才九卿高惟月之班四國  
徧予蓄之績維是胸中之湖海飄然與造物者游發為  
筆下之波瀾殆非食煙火人語脫畧軒裳之表逍遙岩  
壑之姿然而當世望其有為吾君引以自近旋由次對  
荐畀輔藩居中則可寢謀于淮南捍外則尚何憂于江  
左雖咽喉之內地實襟帶于上流眷顧周行見大夫無

可使者儀圖宿望一敵國豈不隱然不妨玉節之重臨  
佇聽金甌之有命某低徊一第遭蹇半生素亡踰人矧  
未更事猥玷公朝之荐口重慚計幙之素餐會逢十乘  
之啟行欣托二天之覆露豈若秦之視越瘠當不動心  
倘如晉之用楚材或堪為役

通留經畧啟

王弱翁

西洛耆英嘯傲三公之府南宗冷宦依棲數仞之墻先  
上日以通名望下風而起敬竊以先達之于後進世族

之于素門勢分固殊授合亦寡惟元城之在宋間業有  
徒與了翁之居淮及門者衆而況三朝元老之適嗣一  
代人物之宗師稍有知識皆知歸向恭惟某官文章奎  
壁德望華嵩忠孝通乎神明出處關於世運故國謂有  
喬木稱到于今後人猶愛甘棠何況其子肆春秋之鼎  
盛歷中外以旂揚郎省陞華風采耀鳴珂之列邊庭出  
使笑談獲全璧之歸持麾把節于湘中易地建臺于江  
右仁心撫字山林野史之屢書陰德平反道路口碑之

交頌開十連之帥閫屹百粵之長城惠行而龍戶驩呼  
威肅而鯨波恬靜奈外地去天之遠而浮雲蔽日之明  
一壑來歸六丁莫挽蓋韓李家傳之清白素所服膺而  
金張勢焰之薰蒸耻于炙手勁草當疾風而不改寒花  
于晚節以尤香種樹山中白傅唱風流于九老植槐庭  
下魏公傳事業于三郎傲睨軒裳追隨觴詠勝事園林  
清時鐘鼓如許清閑上天將相孰為輕重平地神仙此  
固衣冠之美慕其如冕旒之簡懷欲副岩瞻行膺枋用

伏念某癖惟視古樣不入時對策廣庭徒有空臆盡言之直校文列陛乃罹疾聲大呼之讒比求宗邸之冷官隨得翻林之化筆未能適道敢為好事幸大州本父母之邦而年家忝子弟之列誘掖之以藥其失推輓之以玉于成既有耆德以依歸庶免生徒之嘲訕熏和染教期為王孫公子之範模舉滯拔淹全賴察父哲兄之提挈

通安撫衛大參啟

李漢老

書生漫仕抗塵縣掾之卑卜吏涓辰隸役帥連之下藐

塵埃之簿領跂霄漢之符章斐然脩詞甚矣犯分恭惟  
某官造道自得經德不回退然得聖人之清進則任天  
下之重外凌雲之未剪內偃月之方深去而違之十載  
孤舟之橫水時乎可矣一朝巨棟之擎天不負獨對袞  
衣之詩盡洗兩造吾門之誚入參國論出庀官方卒以  
道而屈伸初何心于止速在外則植旗旄羅弓矢公豈  
此榮其功之銘鼎彝播絃歌士誠有望不謂聽麻于文  
德轉而分竹于武安長沙千里之平古稱清絕洞庭九

州之大新困繹騷茲勤二三執政之行殆非尋常謀帥  
之比自天有命固已興宣室之思惟帝念功寧久作南  
邦之式暫撫湘纍之蘭芷即歸商鼎之鹽梅民無不獲  
之天公有無窮之聞某起家素賤受質朱愚學不全人  
空守嗜書之癖飢來驅我遂生竊祿之饒不虞小吏之  
凌競自託大鈞之塊比遷俊造而厠下列嘗累一陶甓  
章服而揖上官惟當三沐

通浙西袁安撫啟

李漢老

十年幕府負公事未了之癡千里王畿隸華使周爰之  
度聊步邯鄲之故欲瞻京兆之真輒脩偶儷之詞薄叙  
畸孤之迹伏念某學惟洛誦家本唐餘因應試而惰農  
遂去民而就吏昨貪近祿浪賦遠游歷井捫參再造魚  
鳧之國逾汚入渭兩經鳥鼠之邦偶爾得歸置之勿論  
茲操破釜來問大鈞辱令芻狗之陳更贅木牛之運舉  
頭見日良忻咫尺之天滿腹飲河政不過斗升之水然  
非有萬間之茆若為三匝之依伏遇某官器博而周材

宏且毅無曲學以阿世言言博士之風不錮人以收功  
挺挺司徒之烈徧儀撫仕具載休聲惟長安諸夏之原  
視商邑四方之極宜得翁歸之公潔仍兼廣漢之聰明  
美印無以易堯持教使之告舜京師浩穰已迎必肯繁  
之間侍教論思即聽屢凝嚴之上尚念某不堪位置何  
足控持效韓愈謹奉大尹之書非為文也慕劉向獨序  
馮翊之傳尚有志焉

通楊安撫啟

危昭德

疏榮中禁移鎮上流曉行湘水之春想難攀于舊轍日  
賞峴山之景已近聽于來音拜履未遑馳箋徑達恭惟某  
官千齡異稟四海芳名得于忠厚之傳加以淵源之學  
政方流于花縣聲已達于楓宸屬多壘之為憂至奪情  
而強起虎符竹使甫臨鎮于近邊霍啖風聲已飛傳于  
遠塞過師枕席之上折衝樽俎之間底定武功升文華  
監忽遠長安之日去開衡山之雲平李愔之糴以脩凶  
荒明皋陶之刑以肅奸宄紅旗破賊旣飛捷于九天黃

麻似經知告庭之即日適以封疆之慮尚勤鈇鉞之臨  
惟是襄州甲于京介最風寒之要處實天險之奧區屬  
時傷創之甫寧如人虺羸之方起血脈正資于護養精  
神未暇于飾脩此問甲兵既非晉人之犀利旋觀營壘  
亦非諸葛之規模望公之來以日為歲得李牧而為守  
匈奴豈足憂哉有充國以屯邊羌人不敢動矣上既寬  
于北顧公即慶于東歸鎮撫有餘經綸何限某適官期  
之甫及服吏役以惟新白鹿陂頭猥贊碧油之寄青牛

關外忽傳紫氣之臨遙瞻行李之光深切望梅之意有  
河陽之幕以致溫造雖愧非材勒淮泗之碑以頌晉公  
已思濡筆

通李制置啟

朱復之

分楚服以殿藩冒膺寵數控吳都而制閫近接聲光星  
聯軫埜以在天水會江流而宗海志同氣合牋往神馳  
恭惟某官伊尹佐王之才班馬傳家之學淮壩八議篇  
篇玉鑑之秋帝學一書字字金莖之露曩游碧落密侍

清光挾雲漢而分天章將上規于典禮呈琅玕而叫閭闔  
請下採于芻言身歸岷峩名滿宇宙以彼外庸之績摠  
此要衝之權昔天下曹劉走馬跳兵之地迺禁中頗牧  
輕裘緩帶其間根本內強風寒外護若周公瑾之方畧  
與陶士行之經營使人慨興千載之思惟公豈在二人  
之下江山如舊斷為烏鵲之南飛苑落可依尚使犬羊  
之北走將益恢于上策以共濟于中興某舊辱深知今  
慙並命在珠側而我穢章鄰照之見分其波及者君餘

愧上游之不逮

通葉憲使啟

戴翼

東壁清蹕暫領繡衣之斧南昌小吏喜依玉節之麾誓  
以身歸大造之陶鎔瀝此膽于細夫之竿牘犯嚴造次  
俟命凌兢伏惟某官學老而文秀人今而道古貞心貫日炳炳六  
泰階之昭符勁節凌霄岩岩九華峯之鍾秀所養者得  
孔孟聖賢之定力故發而皆變高遠大之奇勲自登龍  
虎之上游遙屏驂馭之雋軌三異奏庸于花縣十行促

觀于楓庭綸院褒揚官無冗爵計司豐衍軍不乏需當  
明天子不諱之時居大丈夫敢言之地嘉謀告后鳳鳴  
于岡而梧桐以生正色立朝虎猛在山而藜藿不採望  
峻回天之力華陞維月之聯方觀要路之橫翺胡乃急  
流之勇退蓋天欲救細民于積年之涸轍故上特畀明  
公以十道之祥刑除命甫馳列城交竦豪黠私相顧而  
喪魄閭閻得一笑以伸眉蘇孺文果不受故人之私范  
孟博真有清天下之志雖江右總十一州之地願駐蹕

惟恐朝廷不三五日之間別頒褒璽某蜉蝣小用芻狗  
棄才家貧而笑饘粥之無田技拙而藉詩書以為業衆  
徒庠序飽二十年學舍之蠶鹽負米朝脯奉八十歲親  
庭之菽水雖鶚板屢年之捷奈龍門萬丈之高迨于癸  
未之春始玷慈恩之列仕不擇祿急于為親第一尉如  
綫之微而衆務棼絲之集矧茲劇邑之重尤非謏材所  
堪倘無歸向于中寧免譴訶之及幸戴二天之在上庶  
幾一日之能安河漢占星漸喜近熒煌之坐樓臺得月

願永依臨照之光

代通四川趙茶馬啟

李漢老

分已跡之旗旌濫膺守土占益州之分野知有使星欣  
竊庇之自今愧修辭之已晚恭惟某官風猷凝遠天韻  
宏深博極羣書太乙之藜相照文燄萬丈長庚之夢不  
虛藉未陳周召之詩書亦宜獻間平之禮樂恬為丞之  
再轉甘出守之一麾刻銅虎之符游揚美最護木牛之  
餉益茂膚功謂宜運海以搏鵬又使摘山而市駿周原

之茶膳膳包以紉奩魯垞之馬駟駟爛如雲錦豈容黔  
突行有紫泥某頑頓之資踈鹵於事將指以出濫持天  
子之節旄無功而還不得月氏之要領敢意冒升于荷  
橐且令假守于銅梁有如凌兢仰荷含度東西之瞻使  
節倘未賦于旋歸前後之間清塵尚有餘于同味

通王泉使啟

洪景伯

帥閭疇庸冶臺陟寵行行且止而避御史威望素高皇  
皇者華而遣使臣利權增重八鸞蒞止百雉聳觀恭惟

某官氣直而剛學純且博垂大名于方冊之上殆四十年表清規于縉紳之間纔一二數入遼翔鴻之序進升嵒笏之班當瀾倒之衝而定力不移有壁立之風而危言自信人方患積薪之勢公獨為曲突之謀發巨奸于間不容穢之時制火變于危如累卵之勢盡奪羣邪之氣復開衆正之途雍齒且侯魯連已去吾在汶上矣誰謂留行君薄淮陽耶不妨臥治方寬北顧又趣東來闡天地之藏于咲談運造化之功于掌握不勞笏畫自見

錢流雖心計之長正難其人然風采之著寧久于此立  
九府之圖法小施橐籥之功陳六符之泰階即試鈞陶  
之手某自甘獨冷共咲太清久矣獲從諸公之游今焉  
韋際一世之望倘許執經而問難庶幾就道以漸摩江  
左之見夷吾何難富國汝南之有顏子正賴鑄人欽嚮  
惟多鋪張罔究

通福建李提舉啟

方蒙

躡跡鴻鸞嘗望魁躔之色叨榮壯駱得親使節之華平

生素見許以襟期聯事又相關于脈絡喜而不寐辭以  
見情恭惟某官貫日忠精彌天聲價奪龍頭而鼓餘勇  
早嘗空冀北之羣執牛耳而主齊盟今見推斗南之一  
頃鄉鄰之有聞入帷幄以贊謀迄今五羊之境安全藉  
六鰲之名重其出處進退之際乃理亂安危所關遂上  
蓬山胸著青藜之劉向至躋粉省眼空皓首之馮唐幹  
魁柄惟少遲之扈屬車豈不可者屬時皇上惠顧閩中  
潤四方霖雨之恩普一道福星之照公舉刺而吏貪之

五言家畜考卷之七

近水之臺甘苦必均休戚必同有無相通緩急相應  
與故人飲雖非廬訪之所宜為君子僚惟願歲規之樂  
告

通潭州馬通判啟

榮膺宸綽顯貳价藩千里展長沙之平古稱清絕別駕  
居刺史之半今得仁賢先驅有嚴和氣已溢恭惟某官  
材猷凝遠識度閑夷勲業終歸于伏波雲初固在方畧  
何如于封虜風烈隱然久載休聲宜躋華貫尚屏星之

借重使湘水之安流清風明月之平分折瓊枝而繼佩  
高蓋華軒之一丈齊玉軼而並馳邦國不空公侯必復  
某失身副墨食志勾朱綴簿上而趨閣前繞枝已久采  
水中而搯木末託廕方新尚徼風雨之幘幪庶免塵埃  
之簞楚

通王知縣啟

方巨山

天各一方幾費池塘之春夢地方百里適分鄰壁之夜  
光矧同班飛太史之鳧敬憑積傳故人之鯉時其復矣

喜則楚然恭惟某官落霞孤鶩之英辭舞雪游龍之妙  
墨斗以南斗以北猶為奎宿之躔江之東江之西兩贊  
使星之幙曩聞畫諾備極拊摩予以知寶婺之源賴有  
此玉山之秀畫簾嘗寂夜戶自恬大夫曰賢何乃奏瑤  
琴於五柳之縣天子有詔爾其鏘瓊琚于萬笋之班某  
一拜以還幾年于此憶買犢荒山之底誰念吾民之最窮  
想停驂野驛之寒曾拜君侯之大惠敢不三沐願聞一  
言堯舜為吾君民毋憂掣肘魯衛之兄弟繫欲比

肩翹企金音庶幾玉我

狀

謝董侍郎舉狀

李漢老

隨驃騎之幕濫備執鞭刺公車之章遽蒙推轂心感恩  
而欲白面抱愧而發紅伏念某生多艱從宦尤拙貴人  
令其出門下既不善于走趨大夫羅而至幕中亦備勤  
于收拾豈謂半年之內復為千里之行治法征謀紛紛  
未定幕書檄筆錄錄無奇然白日實照其精誠則赤雲

可占于勝氣况值匈奴百年之運必復春秋九世之仇  
颶犀扎而咤聲旌在此行矣封龍頷而獵麟脚竊有望  
焉曾未輸橫草之勞何遽辱采蘋之薦之吳下阿蒙之  
學顧曰淹該無江南子布之詞及云典麗裨益之功甚  
寡獎予之實何多伏遇某官以社稷臣為詩書帥孤忠  
可貫于日月至誠之足達于天淵一鶴一琴人皆望清  
猷之出萬牛萬甕賊必待崇文之勤佇觀十乘之行大  
作三軍之氣繫單于之頸慰祖宗在天之靈犁匈奴之

庭為疆敵侵邊之戒于以峻旂常之績歸而策鼎鼐之  
新凡在紅蓮綠水之間必入赤箭青芝之用某敢不  
力磨其鈍圖稱所蒙插羽銘山敢銜文章之小技冶金  
伐石願歌竹帛之大功

謝聶侍郎薦舉狀

戴翼

二年岩邑分甘梅隱之淒涼一秩公車言重荷囊之論  
薦榮甚初宮之破白恍如再第之取青方目警一鶚之  
書復手捧雙螭之翰椿松為之動色桃李自此生輝捫

心知歸稽首以謝竊以向陽之木每易以為春鬱澗之松最難於見日地勢之遠近既判人情之取舍亦然故迹不在閣下之庭雖昌黎未免于疑信而言必近堂上之聽斯驂茂獲預于提撕矧薦舉之選甚艱而職令之員尤挾因循近日奔競成風下之人急于求故惟任私情而不恤于公論上之人難以應故止及近地而無暇于遠方乃欲破去拘攣之見而一付于公務求質實之才而不遺乎遠此則寒峻中千百事也其在當路不一

二見之如某者崎嶇半生僥倖一第竊祿以迎侍親老  
菽水常甘潔已而佩服官箴槩冰自厲故處生數百里  
外常凜然如臨大府之前雖守官一二年間欲自此以  
行平生之志祇自謹于修飭初不求于聞知敢期王公  
大臣于采訪之中獨取小官下吏于疎遠之地古道自  
任今人所難細論華路之褒揚實倍他人之倫等舉詞  
多兩句而止今則二十字特書而最榮常例以照牒為  
先茲馬合一道奏狀而俱發似此眷遇異乎尋常誓當

終身敬事斯語佩力學奮身之訓則他日當無負于所  
舉誦能官得意之言則異時在無曠于厥官政欲助其  
長則思匪懈于公勤事欲得其平則願益精于剖決恪  
守四知之戒倍殫千慮之疑庶弗辜推轂之恩或可為  
銜環之報茲伏遇某官清朝元老正學宗師東省西樞  
參贊經綸之寄重出藩入從論思撫士之功全既出為  
天子拯此方溝壑之民必須此人才為異日鈞陶之用  
遂令庸瑣亦預選掄某敢不勉奮孤蹤力堅晚節持一

念不貶之學為異時誓報之圖自顧何人既辱玷山公之  
之啟當思許國謹母荒陸氏之莊過此以還未知所指  
謝陳提刑舉狀

經年夜雨誰憐泮芹之清一日春風忽破庾梅之白郵  
筒飛墜奏牘光搖競看大使之文書乃覩小夫之姓氏不  
爽釘金之記竟叨褒袞之榮品題十六字以甚嚴銘刻  
千萬言而不足竊謂先朝立薦舉之法是乃累聖開功  
名之途不謂昔日網羅英物之公轉為後來周旋人情

之具求而得也弗求則不得也偉途既開賢者與之不  
賢者亦與之濫竽寧免柳下惠之阨卑官臧文仲不能  
引絳老人之困泥塗晉趙武弗及知養成一世奔競之  
流遂致四維操履之玷故臨難無竭節之守而居官多  
曠位之愆在承平猶以為非况艱難烏乎曰可自非孤  
風之卓立夫豈頽波之易回激揚之間趨向所決若某  
者心固動而德弗進年齒寢宿而意不揚雖聞先生長  
者之言粗知古道然滯經生學士之業猶汨虛文頓懷

綉組之慙欲求耕獵之實偶投足于塵埃之地莫安心  
于禮義之容衿佩競超于城隅絲竹不聞于堂上鄉隣  
之聞猶纓冠而往救門外之寇敢遽席以偷安當同舟  
遇風之時出位不顧奮執戈衛社之勇非學而能義有  
當然功非所計在泮水獻馘幸依魯僖之賢息潢池弄  
兵盡在龔公之化曾非一介若有寸長寡其過而未能  
無所學之可取胡得之于物論併舉以為已榮伏遇某  
官崖畧甚高戶庭無壅登車有天下之志允藉澄清推

轂追古人之風不由請謁元使君當路萬物吐氣烏大  
夫秉鉞多士拔尤使致妄庸亦蒙收錄某敢不益加砥  
礪無負陶鎔拜官公朝謝恩私門敬奉羊侯之所戒遇  
非衆人待以國士當圖豫予之未能感激無窮敷宣曷  
既

謝彭黃堂舉改官狀

鴉飛春雪方蒙褒袞之華鶚送秋章又預誥金之賜化  
治幹旋之力重師門成就之功深百拜周章萬分榮感

竊以薦敷一路固欲拔乎人材得失兩歧亦有關於造化垂成幾壞曾嗟薦福之碑已失復全或反相如之璧信于中自有消長乘時之理而在上實司轉移闔闢之權苟或得成大非偶爾某者蹢躅不武拙訥無文百不逮人一惟安分欲動叔向之聽既乏蠟言要求子公之書又無蟻援甘委此身于造物敢蒙榮望于窮途惟老天不棄于孤寒故今日欣逢于特達方自下車之始游蒙推轂之誠薦以序陞俾之出幽谷而遷喬未還之京剡甚

矣障百川而回狂瀾雖云終定者天然果孰為之地伏  
遇某官斯文元氣前輩盛心品類曲成不使一物失所  
羣才並舉惟恐片長或遺知某之愚無他腸念某之拙  
無繆巧計之一紙重若干鈞定力底柱而不搖公論持  
衡而平決兩全所欲衆嘆其公某敢不稽首恩門服膺  
師訓行修何有期以經明民服未能勉之政理敬佩撫  
摩之誨以為續效之圖益勵初心庶蒙鈞惠吹噓借便  
雙鳬欲近于雲程消息指期一雁佇傳于春信其為感

詠罔既編摩

遠迎 攀違 辭 先狀

迎蔡相裕陵還闕狀

伏審竣事西陵還轅北闕祇奉祠于虞幄行稅鞍于都  
闈即遂瞻承良慰傾佇

迎文太師到闕狀

側聽德音睠思國老謂夙欽于勲望故渴見于光儀詔使  
旆以屬途慰邦民之延首炎暘貫序勉馳輦洛之郊飛

卷四十九  
蓋臨風佇邇宣溫之戶某武處在位阻候行郵伏祈上  
為廟朝益調寢餽

迎鄭資政狀

伏承飭行自蜀修覲還朝旋聞駟剡之來繼有宮祠之  
請雖獎安自便聊適于雅懷而傾矚攸同未厭于輿誦  
念山川之渺遠丁暑雨之裨延跋涉良勤遵順曷若輒  
寓誠于竿牘庸伸敬于記曹其在詠恩併留前叙

迎文太師入覲狀

伏審肅颺台旆來覲帝庭寤寐粹容即奉清閒之獎馳  
驅大道罔辭次舍之勤屬春律之始和諒福襟之牢固  
側聆車馭將屆郊圻佇遂覲瞻預增欣抃

迎韓相入闕召以南郊陪位狀

伏承顯膺嚴召聿相大祠渴舊德之儀型留精衷之寤  
寐都人屬目共瞻車馬之輝光裡僚陪容佇接珩璜之  
步武未階覲覲預切忻翹

迎李戶書狀

伏審顯膺名節入覲嚴宸解全蜀之金龜臨西秦之周  
道抗搖搖之旆將憇于近圻觀兩兩之符佇披于華采  
緬惟福襟冲裕使騎勤煩爰冒秋炎尚留館傳即階迎  
合預切瞻翹

迎韓相自洛西由闕判北京狀

伏審肅馳大旆肆近路朝都民係道以言瞻宸宸注懷  
于來見矧惟幕屬之舊尤佇袞衣之還方冒沍寒尚勤  
行色冀順寢興期屆禧祥

迎戶部陸侍郎狀

伏審解符邊閫貳秩省闡方祇命以造朝已抗旌而遵  
道屬在暄妍之序諒多跋涉之勤將獲披承併紓傾係  
其為忻懌未易究言

迎范戶部狀

伏審顯膺名節入覲嚴宸解慶節之冰符臨西秦之驛  
道隼旆抗路將覲于前騶星弁盍簪佇聆于燕語緬惟  
陽春偃薄福履冲安方垂轡之尚勤冀興居之益護

迎張宣猷狀

遠驅台旆甫次國都朝論且依上心虛佇阻于官制莫  
遂郊迎冀趨命之弗違副瞻風之已久

迎永興李寶文狀

伏審光奉宸恩易綏帥閫旌牙就道將布政于河湟單  
騎戒行方指途于崤澠矧屬睽風之久可期晤語之歡  
適此凜寒尚勤館穀諒惟賢德倍協和倪併俟披陳悉  
敷翹仰

迎新守謝寶文狀

切承使旆已次府圻諒惟涉履之勤克協康寧之福即  
趨候館以望星躔併紓悃臆之誠用釋睽違之久其為  
欣仰莫或喻云

迎呂龍圖知太平州狀

伏審肅馳戎旆將屆府城惟茲跋涉之勤爰冒炎敲之  
未想惟妙養無爽太和即遂叅迎庶殫蘊懃更祈保佑  
益副翹誠

迎周漕使狀

伏承遠馳台旆俯及嵩郊屬時霰之粉零冒駟途之凝  
沍切惟行李倍想艱勤某限官守之有常阻畿封之納  
謁冀加調護副是係瞻畧布柔函迎通典記

迎呂秦州狀

伏承改帥西秦解符舊陝歷關河之阻將及于雍郊均  
牛酒之歡暫追于里社竊惟勤勞華轡偃冒風埃德履  
保和道襟集社某佇諧迎晤冀釋瞻翹倍祝養頤下符

依仰

迎程叅謀狀

肅馳大旆將次近坳顧慕義之無從喜瞻風之有便恭  
惟台官英才經世遠畧過人仰膺當宁之知出任臨邊  
之寄折衝禦侮坐肅蠻方第賞策勲徑濟法從掇承休  
于詔檢用叅決于籌帷行奉湛恩入居邇弼某承移書  
之未果忽杜教之先臨悚佩兼深敷陳罔既

達文太師狀

伏審袞衣去國官鑰均勞屬官制之所嬰展郊違而莫  
遂瞻企旌旆某下情不勝依戀之至

達文太師致仕狀

近審勤叩冕旒上還印紱寵名烜赫崇冠于廟朝勲德  
嵯峨榮傳于海宇年雖致事忠弗忘君伏以某官功贊  
萬微材兼衆甫久告猷于丹宸早論道于黃扉百祿具  
晚羣工式憲凝壽齡于衛武逾班品於裴公庸副傾祈  
更希調護

違兩府親王往相襄事狀

改營吉竈求護輅車往辭相魏之郊暫遠宣溫之陞履  
聲踵武阻接于晨朝車轄載脂適臨于眷序其于仰止  
良用惘然冀保福襟下符民望

違何太傅啟

比奉優恩俯從誠請起衰蹤于既老萃寵數于將歸念  
抱沉疴久違英袞歡得謝蓋蒙師長之憐今悵叨榮復  
去散人之號尚賴至仁之寬庇暫令晚景以投閒徜徉

泉石之間想像風雲之會行雖問舍敢久駐于江湖力  
可造朝即再瞻于杖屨

違帥臣監司狀

廢斥三年獲省憊而託蒞沂沿萬里將扶病以造朝遽  
遠光儀實深依戀莫緣詣別益重感慙

違蔡相出守陳州狀

伏承顧解政幾弗違陳請分虎符于近甸且鷄首于澄  
河鳴履逮章阻接昨朝之步武頌春樂國佇聞來暮之

歌謠竦企飛旌莫遑摻袂益祈珍攝副此具瞻

違韓相赴任北京狀

伏審康侯晝接初遠于彤庭星駕宵征往臨于北部方  
勤行邁阻侍誨言久沐眷知第深悵韶春尚淺凜氣  
猶多冀保寢興少符係仰

違張資政知鄭州狀

伏審懇辭幾柄求請便藩露章堅至于再三優詔暫均  
于勞逸久陪步武驟濶風期曷勝慕用之誠徒有涓冲

之恨抗旌遵路方冒履于凝嚴因驛馳音幸相望于密  
邇冀加精護時襲餘芳顧惟禱詠之深難罄編摩之際  
違呂觀文出知郡狀

伏承夙膺溫檢易鎮殊藩寬黼座之西懷廣棠陰于昔  
愛辨嚴伊夕戒較在途屬寒律之載凝勞使臣之兼驚  
冀綏冲養庸副具瞻

違安密樞之朱千墓事狀

伏審賜告中宸襄事親龍辨裝有日效駕就途屬氣序之

嚴凝惟次舍之勞勩顧綏冲履以副眷懷

達王端殿出知江寧狀

伏審進干上聽脩列至情繼夏露章懇祈解政出守思  
里閭之樂相從憶昆弟之歡輟政中臺暫藩南服甫達  
去旆亟肅行轡莫獲晤言何勝慘結曩司言于鼇禁茲  
議政于虎帷幸接襟期屢綿歲月忽愴驪駒之別徒勤  
鵷首之瞻屬履秋標冀順道守

達蒲左丞出知汝州狀

伏審寄領卽藩戒行南道載瞻大旆徒切于嚮風言別  
長亭弗諧于伸薦霜秋杪律晨袂薄寒倍祝珍調少符  
係戀

違王守還朝狀

伏審肅將師律出靖勾吳大振凱旋復還魏闕瞻使旌  
之雖邇預祖帳之無從悵仰之懷敷陳罔喻

違奉使狀

出震開祥方盛惟南之祝飲冰戒道寔勤自北之行諒

登覽于阻長匪暇遑于興寢願加調護以副瞻懷

達奉使狀

惟月之正實重于履端有皇者華方處于致聘顧隆冬之殊凜宜夙駕以良勤冀加衛于興居用深符于嚮往

任滿辭太守啟

力職罔功曠官茲久將盈最秩即治行舟比出次于河湑迺曲煩于祖道為禮厚甚撫襟瞿然屬草茁以叙達每悁依而不已歷春云晚涉道方賒冀謹保願少符傾

嚮

回兩制辭狀

伏承已飭行轅將還治所沐台驢之損挹勤騎氣以迂  
臨拘文阻謝于高閒有感第銘于懦悃其為瞻詠未易  
究言

回入國王侍郎辭狀

昨者嘗令境首預肅館人忽使騎之行過墜書函而俯  
及趨叅莫及報謝無階深抱愧悰遂采殘歲伏審張旃

遂事弭節歸朝邇象闕之虛匭違紫蒙之冰霰躬行僵  
落勤勩良多神想忠嘉興居甚適候先驅于穀騎謹致  
餽于乘車當况記曹恭陳禮牘第祈順愛以副詠言

回謝生日壽香狀

某偶叨顯遇屆茲誕辰念顧復于慘懷辱謙勤而示禮  
永言惠好過沐輝光銘荷在中敷陳弗悉

到闕與侍從先狀

頌藩護塞久愧東垣之民賜詔解符亟趨北闕之觀冀

言遂于朝事將造覲于高堂獲叙咸臧仰依休庇敢馳  
緘牘敬達記曹惟祈寬仁光恕崖畧

到闕與侍從先狀

東垣護塞再易于歲華北闕賜環行瞻于霄極佇接鷺  
班之後綴因望鳧舄之前約併導素誠少紓勤想敬馳  
緘牘先達記曹

太守入境與文太師先狀

此者誤交印紱爰整羈鞅崎嶇初出于關中繾綣已懷

于洛上望輝光而在邇馳悃悞以良勤忤懌惟深編摩  
罔究

五百家播芳大全文粹卷四十九

欽定四庫全書

五百家播芳大全文粹卷五十

宋 魏齊賢

葉 棻同輯

制誥

除右僕射麻

汪彥章

君臣相湏成體股肱良而元首乃尊政事要在得人紀  
綱張而衆條皆舉朕遴選賢佐協圖治功孰膺名世之

期我得爽邦之俊肆頒大號用詔羣工具官某才博而周氣剛以大出處行藏皆得乎道死生禍福不移其心謀國盡忠若蓍龜之先見捐生挺節如松栢之後凋魏巍真社稷之臣奕奕允廟堂之器昨從人望參決政機唯獻替之日陳殆弼諧之天授定策而安劉氏素聞周勃之賢矢謨而翊舜朝終賴臯陶之智是非擢登宰路實首中台廣井邑之提封增賦租之奠食肇開侯社并峻文階以明論相之公以輯用賢之慶於戲君不借材于

異代所資當世之英雄天將降任於是人必付終身之  
勲業朕既兼收於群策汝其勿棄於公陰往恢厥圖卒  
相予治

皇叔加恩麻

朕膺祖宗之傳序蒙天地之况臨見泰元之尊幸潛交  
於彤鬯眷宗室之老宜首霈於龍光錫以命書頒於朝  
著具官某疏達通敏忱恂靖莊歷險夷而秉忠孝之心居  
富貴而絕侈驕之習出神明之後雖益疏而不王聞義

理之多知為善之最樂昨付齋壇之鉞仍乘夏篆之車祇  
庖時巡克敦屬籍茲成複廟之饗益見維城之功是用  
增廣舊封併加真賦於戲脈膳分兄弟之國蓋莫重於  
天潢帶礪指山河之盟其永藩於王室徃服休命無忘  
遠圖

皇叔祖加恩麻

朕涓吉杪秋乘上辛之正氣肇禋重屋修遽古之濶儀  
會天地祖宗之神奉粢盛圭幣之薦惟時公族實相躬

祠乃均賜於寶釐用光華於屬籍具官某清脩寡欲肅  
括提身於親莫尊為劉氏之祭酒其德可尚分魯公之  
大旂以宗盟之統而親近弼之班以王土之封而襲洪  
延之慶聞合宮之明祀承明詔以駿奔當柴燔之升禋  
奉匏尊而叅酌曲盡始終之恪實惟左右之勞綏我思  
成莫如同姓爰侈井封之舊仍陪圭食之真於戲將相  
寄於安危敢重煩於耆艾親愛欲其富貴姑務極於  
尊榮勉遵令猷永介多福

呂頤浩加恩麻

朕承列聖之基荷三虛之眷當艱難屯否之運賴擁佑  
安全之休念德之大者非美報無以昭其誠曰禮之隆  
者惟躬祠可以達其義乃涓剛日祇見合宮眷吾同德  
之臣實有侍祠之列爰頒渙號用告明庭具官某偉識  
自天英才經世以忠勞而安社稷屹如山岳之承以強  
敏而決事幾沛若江湖之下有大勲於彛鼎無異論於  
搢紳昨辭廊廟之尊出殿藩維之重中權不試南紀以

安歌破斧而美周公雖嘗分於內外開延英而見裴度  
茲復寄於安危方鋒車祗郡之辰適玉食齋居之次元  
老顯相群工駿奔爰增井食之封益峻鈞衡之望於戲  
正直為神之所聽固雅志之素孚福祥非朕之敢專宜  
均恩之首及徃弼邦治共承天休

韓世忠加恩麻

朕躬帝親之享合丘澤之祠一純二精幸拜熙成之況  
千乘萬騎孰宣拱扈之勞我有勁臣宜膺徽數具官某

智不辟難勇常冠軍先人有奪人之心進則奮沉雄之略尚賢無自賢之行退而皆名義之談兼兩鎮之旄節視三孤之皮帛軍律整甚王靈赫然遠斥堠而省文書士皆為之樂死儼師徒而討亂略疆由是以少安比脩重屋之儀尤謹周廬之衛祝嘏所告君臣則同乃增井邑之封仍衍賦租之入爰示旌忠之義以均受胙之休於戲心膂爪牙方資籌策之勝藁堦戟纛益聳威儀之瞻惟滿盈天道之所虧惟正直神明之所聽服我休命

欽哉惟時

張俊加恩麻

朕邁脩吉禮歌昊天成命之詩翕受昌靈拜黃帝泰元之策孚號四海疏恩百工有懷隆委之臣方屬凱旋之役其因祚祉以獎賢勞具官某材雄萬夫身經百戰統騎士材官之衆屢奮天誅執信臣精卒之權早膺邦寄綰節旄之兩組視皮帛於三孤昨奉王靈出征江介冒敵而進忠如皎日之明當鋒者權勢甚迅雷之擊曾未期

月卒成大功靡淹貔虎之師坐獲金湯之固惟邊隅之綏靖致禋祀之脩成丕懋寵休誕明忠力乃進封於多戶仍申錫以真租於戲聖動也威莫大安民之武祭澤之大宜均惠下之仁惟忠義天下之大閑惟謙亨君子之終吉益勵爾節用承厥休

除觀使麻

運籌而決千里之勝茲有賴於宗臣失律而致三軍之凶顧可居於宰職眷吾次輔嘗領中權旣治疆場之憂

宜辭機衡之任具官某早緣人望驟履政途謂其惇大而有謀可以艱難而立事故擢除於國柄仍專付於戎昭總諸將萬夫之屯當長江一面之寄所期李勣為我長城寧使周公至於戕斧逮敵人之臨境率我衆以交鋒惟勝負者兵家之常當死生為天下之計乃因奔北唯事退藏至大棄於其師將焉用於彼相會邊虞之稍息聞物議之交興已沸民瞻難逃策免念備股肱之久姑存禮貌之餘止罷要權猶從優數賦殊庭之厚祿加秘

殿之隆名於戲泰階平而風雨時始共期於康濟采薇  
發而征伐缺今良失於倚毗尚冀桑榆之收復全龜玉  
之毀勉圖偉績用對殊休

除觀使麻

獨化鈞陶之上嘗有脩於弼諧閔勞官職之煩宜特加  
於崇獎惟時上宰實我元勲茲祈辭於近司爰寵頒於  
殊渥誕揚大號敷告群工具官某心術疏通性資明銳  
運籌泉湧獨當天下之危機游刃風生能斷朝廷之大

事昨屬艱難之運尤輸經濟之忠冒險直前服勤無數  
取虞淵之日重正乾坤問襄野之途卒安宗社顧在廷  
之莫及方當寧以仰成而浸懷偏見之私殊失大臣之  
體占吏員而有虧銓法專共柄而幾廢樞庭下吳門之  
詔則慮失於先時請浙右之行則力違於衆議旣人言  
之洊至於物望以靡諧亟騰引去之章莫副挽留之意  
念有銘書之偉績難從策免之常規乃峻曩章務全體  
貌植牙建纛總節制於雄藩執壁面槐視班聯於上衮

假以真祠之佚從其私計之安皆儒臣希有之榮蓋邦國久虛之典朕為無歉汝亦有終於戲險夷一心非忠誠孰能至此進退二道惟明哲足以盡之矧兼將相之崇靡缺君臣之遇毋云去位不我告猷

除韓世忠兩鎮節度使麻

提貔虎以振天威深入山川之阻斬鯨鯢而攄國憤永為宗社之安既執訊以來歸宜酬勲於不次肆頒明命式敷治朝具官某事上樸忠臨機英果稟剛故俗甘陳

兼六郡之良決勝重圍飛羽有萬人之敵早脩師干之  
錫旋膺齋鉞之除豈惟蹇蹇以匪躬每見多多而益善  
昨屬時巡之遽因成國步之艱群小窺朝元兇干紀旣  
罪人之未得斯王旅以徂征迎敵鼓行靡待前茅之偵  
擒囚歸報遂成獨柳之誅華夷由是以知威天地為之  
而卷褻凱歌一奏盟府交書是用取累朝最盛之規加  
兩鎮久虛之渥視班亞保升爵元侯增邑食於爰田衍  
井腴於真賦併為異數用表元勲於戲見無禮於君爾

旣殫於忠蓋歸飲至於廟我何愛於寵褒惟功名烈士之始終惟爵祿有邦之獎勸

除張俊兩鎮節度使麻

三軍利用莫如忠勇之兩全十乘啟行尤貴武夫之兼寵朕博稽輿論優獎虎臣乃疏進律之褒用竦在廷之聽具官某性資沉鷲材力驍雄得孫吳方略之奇兼信布爪牙之勇執干戈而衛社稷居存蹇蹇之忠安邊境而立功名躬履堂堂之陣昨緣多故尤見殫誠提萬旅

以趨朝扈六飛而復辟旋因冬狩留駐海壖偶戎馬之  
長趨帥王師而鏖戰奮當大敵援枹鼓以忘身坐掃妖  
氛用鯨鯢而築觀茲及行朝之底定復消群盜之搶攘  
併錄茂勲用加醲賞秩視三孤之貴地兼兩鎮之崇載  
錫爰田仍加真賦增中權節制之重示上將威儀之多  
於戲有功見知朕旣每存於大信縱敵生患汝其勿替  
於前功惟一心同獎於朝廷斯千載永申於令甲服古  
之訓惟乃之休

皇姪右衛大將軍秦州防禦使知宗正寺制

王介甫

勅先王糾合宗而分職以治之所以嚴宗廟也宗廟嚴則禮俗成而天下治其事豈可以輕哉今朕選於近屬以修宗正之官亦先王治親之意也以爾具官某惠仁孝恭忠信純篤故遷厥位以稱禦侮之實而使任事焉夫士之欲施於政事未有不學而能者學所以脩身也身脩則無不治矣朕言惟服爾徃懋哉

皇姪孫左屯衛大將軍隴州防禦使制

勅朕惟永太祖皇帝德加於後世傳矣而諸孫爵位莫有顯者甚非所以惇叙九族承宗廟之意也具官某躬率德義克承厥休方將營衛之屯而領兵防之任其正使號稱朕志焉

除李璋制

門下若昔大猷紹天休命必有獻享之禮作民恭先必有褒嘉之恩自國貴始翊衛功臣奉寧軍節度鄭州管

內觀察處置堤等使光祿大夫檢校司空使持節鄭州  
諸軍事鄭州刺史兼御史大夫上柱國平原郡開國公  
食邑四千三百戶食實封一千戶李璋世載忠善躬服  
儉勤以後家之洪友為帝室之隆棟入總營衛則兵師  
無譁出乘藩維則吏屬不怠近付京都之鑰外更方鎮  
之旄貢職維脩祀儀獲考進加功號申衍邑封以疇服  
采之勤以協勸勞之典於戲富貴有危濫之可戒祿位  
非侈驕之與期圖維慶譽之終尚協龍光之施可特授

依前檢校司空使持節鄭州諸軍事鄭州刺史兼御史大夫充奉寧軍節度使鄭州管內觀察處置等使加食邑七百戶仍賜翊衛忠果功臣散官勲封如故主者施行

節度使加宣徽

推轂授師擁旌乘塞擅生殺之柄於外係安危之軀於中厥有顯庸宜膺寵數誕揚乎號明示庶工具官某學足以通大方謀足以斷衆事有經天之業有扞城之材

比以明揚屢更煩使遂躋膺仕良副訐謨維塞路之要  
藩實兵防之重寄職爾鎮撫紓予顧憂蓋爵賞之加不遺  
於近小豈藩維之任顧可以弭忘用是疇其展案之勞  
寵以宣猷之號繁人謀之衆允匪朕志之汝私夫任重  
者其憂不可以不深位高者其責不可以不厚號名之  
美禮秩之崇非期假守以擅榮茲用論功而取稱矧夫  
守國之圉謀王之師聯輔相之籍於殿中居士民之瞻  
於天下其思祇慎以付褒優

翰林學士除三司使

三司使天下之盛選也自尚書六官名存實去而三司之職事所總居多則非夫仁明肅乂足以輔世濟物者奚宜任此哉具官某有疏通之才有直諒之操閱言崇議足以經綸王家高文典策足以鼓動當世遂以人望揚於禁林若夫施政之後先生財之本末蓋嘗深思而熟講殫見而洽聞則居天下之盛選主朝廷之大計詢考在位孰如汝宜夫聚天下之衆者莫如財治天下之

財者莫如法守天下之法者莫如吏維予任汝其聽勿  
疑法之不善者汝得以議而更吏之不良者汝得以察  
而去則夫調度之不時費出之無制邦用之不給元元  
困於征求而愁怨於下者真汝之恥也夫行已有恥而  
後可以為士矧吾左右任信詢謀所同而觀聽之所在  
者乎往祇厥官其亡以寵利而為士恥

批答曾公亮以下賀壽星見

省表具之乾象粲然官占以告壽祺之應於傳有稽卿

等寅亮帝工阜成邦采摛文告慶歸福朕躬書瑞史篇  
已循故事星隆晷德尚賴交脩

批答曾公亮以下上尊號表不允

汪彥章

朕以薄德嗣膺基圖繼天理物常懼弗任方賴交脩以  
熙衆治群公卿士外暨庶黎欲舉鴻名措之眇質臣民  
歸美為義則多揣實揆時朕猶不敢

詔答左僕射判汝州富弼表乞致仕不允

汪彥章

卿忠純亮直為國元老朕所持賴急於典刑優游小邦  
足以養疾冀綏福履來付詢謀何必告歸以孤眷矚

詔答刑部尚書歐陽脩上表乞致仕不允

汪彥章

股肱名臣與國同體禮當答謝朕尚難之况年非告老  
之時而勲在受遺之籍不留屏輔人謂斯何姑體至懷  
少安厥位

詔答呂頤浩辭免左僕射不允 汪彥章

君不借才於異代所資一世之豪英天將降任於是人必付千齡之期會朕以卿國之鎮瑞人所帡幪更中外之百為挺險夷之一節博稽輿論升冠總司陞九級而上廉方觀威重月三日而成魄難殉謙光勉圖厥成無廢朕命

詔答呂頤浩辭免除少保不允

朕惟有不世之略然後足以成不世之功有非常之才

欽定四庫全書

五百家播芳大全文粹  
卷五十

十四

然後足以濟非常之務卿邁往之氣絕人之資澤加生  
民勲在王室茲已試之效也故去國未幾靡人不懷廼  
伸勅使軺趣朝行闕召見便坐博詢嘉猷忠誠慷慨議  
論明辨茲用延登亞保之位復俾冢司之權卿不聞孟  
子之言乎如欲平治天下舍我其誰蓋古人自任於天  
下之重如此今日之勢非卿孰安卿其慨然為朕力圖  
所以興復者茲卿自許而亦朕之所期於卿者也區區  
小廉以待常士而已豈足為卿道哉所請宜不允故茲

詔示想宜知悉

詔答辭免端明殿學士不允

朕惟慶厯宗臣馳單車入不測之地以片言成萬世之功相吾三宗如古伊呂朕慨然懷其人而不及見也以卿高明渾厚德頗似之故擢之衆人之中付以臺諫之職果能從容議論動中事幾乃躋宥密之庭將賴維持之力庶使紀綱一振威令四馳坐臻宗社之安復見君臣之盛豈不濟卿奕世之美而成朕知人之明乎陳義

固辭良非所望所請宜不允故茲詔示想宜知悉

詔答辭免資政殿學士不允

卿以剛明之才行精敏之學以卓至之論啟淵深之謀矧嘗率先群臣見朕初載有房琯之辨宋昌之忠茲升廟堂相與圖治曾未數月汎然請辭朕雖貪夫老成之留而閔以官職為累升華秘殿庸示至恩胡為抗章貶損殊甚卿而不可尚誰可哉式煥爾行毋虛朕意所請宜不允故茲詔示想宜知悉

詔答辭免資政殿學士不允

卿奮以周行以誠輔朕飭躬寡過持論正平終始二年  
朕所眷禮方賴宏益浩然永歸挽留莫從良鬱予懷升  
華秘殿姑示異恩式寵爾行毋煩遜避所請宜不允故  
茲詔示想宜知悉

詔答呂頤浩辭免左僕射不允

朕惟漢唐中興之績莫盛于宣帝明皇之時而魏相姚  
崇為之佐是二人者皆以廟堂不世之才天下無窮之

變用能易亂為治即危為安勲業巍然昭映古今朕甚慕之廼者國家蓋多故矣朕念齷齪拘攣者不足以圖今日之事思得英偉大度之士幹旋於談笑之間庶幾折衝解紛無愧前哲卿宏博強毅出於天資粵從外遷甫期歲耳而人無小大皆有裏言乃登元宰之司仍進三公之秩茲實慰中外之望而非朕私卿也古之所謂大臣者以道事君不可則止今豈不可為而當止之時耶其勉修良規濟朕鴻業控避之禮毋庸再三所請宜不允

批答王丞相辭免恩命不允

朕觀於易至恒之象曰君子以立不易方夫恒之六爻  
惟九二悔亡者以其能久中也蓋九陽德二臣位秉堅  
純之德處通顯之位而能久中道則何有於悔哉在真  
宗時則有若王旦在仁宗時則有若王曾皆確守大節  
徧更重任而至誠無息故能輔政之久到今稱焉此殆  
有得於恒九二之義也卿以直諒端朝之望雋明康世  
之才自代論言預機政以至為相於茲十載而事朕蓋

由一日朕方照臨百辟灼見乃心茲用冠於宰庭益資  
遠業而卿廼未即祇命尚乃控辭夫遜於稷契臯陶蓋  
重亮於舜采然有若散閤宮括均廸於文彛其懋經綸  
勿復有請所辭宜不允

批答梁丞相辭免恩命不允

昔在舜禹舉賢自輔非臯孰賡非益孰贊然未嘗與民  
道其所以當為相之意而民自孚焉蓋至於商周然後  
弼曰帝賚佐曰天生以神其事而播之於衆雖稱補衮

功光前人而四代之風於斯別矣卿學優聖域才冠倫魁質諸卜筮而不疑編諸方策而無愧問朝問野人皆曰賢今茲召卿來歸朕見之曰此予輔民聞之曰此吾相尚可代疏霖雨之命賦清風之章而後能鼓動於中外也哉而卿尚秉謙光未服厥位則是上未能體朕之意下未能副民之情恐非朕與斯民所以望於卿也夫傴僂而共命者辭遜之末節宥密而基命者弼亮之遠圖渙號已孚控辭勿再所辭不允

詔允左僕射新除集禧觀使富弼判汝州

勅富弼省所三上劄子奏蒙授臣集禧觀使勅牒乞早  
賜追納且迄赴汝州本任事且悉卿翊朕祖考功施於  
時德善在躬終始如一朝廷置使實近闕門邦有大疑  
庶幾求助忠賢體國義乃可留而引喻再三便於出守  
重違懇惻姑即所安

勅獎諭賜審刑院詳議官大理寺平斷官

汪彥章

勅趙文昌等省之審刑院齊恢奏據大理寺日奏司狀  
四月一日已前下寺公案並已斷絕無見在事朕初嗣  
服德化未孚永念元元多罹犴獄汝等並膺選撰擢任  
茲讞疑能勵厥官以無留事覽奏欽尚不忘於服

刑部侍郎改兵部侍郎制

勅先帝棄天下不及班命以勞群臣朕繼大統其承厥  
志具官某廉靜忠恕濟以詳敏能紹世美為時名臣膺  
服寵章徃其思勵

欽定四庫全書

五百家補考大全文粹  
卷五十

給事中呂公弼改尚書工部侍郎

勅褒德叙功制為祿位先帝所以熙庶政也朕雖在疚所不敢忘具官某保身慎德舊有勞勩陟降左右是謂世臣惠綏西南風績尤顯冬官之貳其徃懋哉

除司馬光知制誥

勅先王制命之文何其雅馴而與美雖出命非有司之事而討論潤色蓋有助焉以爾具官某操行脩潔博知經術庶乎能以所學施於訓辭俾掌贊書徃諧朕志

除司馬光禮部郎中

勅左右侍從之臣皆先帝所遺以助興政理者也有勞可錄朕敢忘哉具官某行義信於朝廷文學稱於天下比更任使會課當遷進位二等以加爾績爾方以經術入侍而又兼諫爭之官徃其思致厥身使朕之聰明無所不通爾亦惟有無窮之聞

除皇子伴讀


勅某自天子至於士未有不待學而成者今朕欲進諸

子於學求可與居者而大臣以爾為言爾久在諫垣有聞於世茲惟謹選可不勉哉

詔獎論韓世忠

朕惟唐之名將多矣獨郭子儀巍然以功名始終豈非以其謙畏自將有愛君體國之誠心故耶卿屢立戰多計安宗社而每懷兢慎慮涉非彛知天下之至公合古人之大節比以閨門之私謁至投奏牘於公庫國爾忘家屏居待譴既關聞聽朕甚嘉之書不云乎臣罔以寵

利居成功者卿之謂也其逢良韓彥臣除授指揮已令  
寢罷成卿自成之美其卿亟趨表著副朕眷懷故茲獎  
諭想宜知悉



五百家播芳大全文粹卷五十





欽定四庫全書

集部

五百家播芳大全文粹卷五十一

二

詳校官編修

臣謝振定

助教臣常循覆勘

總校官編修

臣

王燕緒

校對官中書

臣

李荃

謄錄監生

臣

梁徵

欽定四庫全書

五百家播芳大全文粹卷五十一

宋 魏齊賢

葉 茶同輯

制誥

尚書左丞除同知樞密制

昔單于入朝於漢遇王商卻立而不敢仰視晉人觀釁於齊晏子退舍卒不敢加兵蓋賢者在朝人民有恃不

動聲色自然折衝故能正容色於一怒之間而懾威稜  
於萬里之外具官某弘毅而任重博洽而有文險夷一  
心踐更衆職危言直論固常折遠夷無藝之求繕甲治  
兵又欲刷四鄰交侵之恥顧疆場安危之未決而羗人  
叛服之無常蔽自僉言延登右轄載疇雅望進貳本兵  
庶幾盡行平日之言可以坐厭未形之難力行所學以  
底丕平

左司諫除御史中丞

自御史府虛大夫而不除則中執法率僚屬而為長耳  
目之寄紀綱所司惟議論慷慨足以感厲特立不欺之  
心惟志行直方足以振竦苟賤無恥之習則風采所繫  
朝廷自尊具官某學知古人之大方智通當時之要務  
徧更言選以直諒聞憤世疾邪無所回撓名從諫省進  
長憲臺度越稠人不次而用宜體任官之意益肩衛上  
之忠知美材有待於久成毋廢壞於一眚之微知刻核  
足以生不肖毋窮極於已甚之地服我休命奚俟訓言

吏部侍郎兼太子詹事

朕惟太子天下之本而賢者為邦家之基思得直諒多聞以為益友庶幾前後左右罔匪正人故茲一時端尹之臣率用兩朝髦俊之士具官某學術之茂幾於先民行義之脩信於當世懿文華國亶居俊譽之崇正色立朝屢劾排奸之力踐更衆職夷險一心肆因銓總之餘入侍儲帷之邃倚典型於老成之重崇道義於齒爵之尊式資調護之功副朕責成之意

中書舍人除給事中

朕初踐服屬時多虞寤寐雋賢當饋興嘆想望老成於  
典型之重登用世臣於故國之遺大儒之效固存君子  
之澤未遠具官某四朝名臣之俊一時耆艾之英聲華  
發自妙年功名見於晚節詞垣視草穆然深厚爾雅之  
文經帷告猷信矣直諒多聞之益服勤浸久發問深林  
維是東臺論駁之司實予萬幾出納之地延登茲位僉  
曰汝宜施置或未叶於人言選任或不孚於衆聽守正

不撓維是之從毋諱有司追配前烈

國子祭酒權鴻臚卿

大鴻臚天下之高選也在廷之位至於九列者寡矣非  
資高望重不得任此具官某以經術中第以文藝知名  
感會休辰踐更衆職載疇雅望進列九卿益肩厲翼之  
心以待非常之用

資政殿學士除簽書樞密院

國家太平無事兵不釋繫垂二百年軍政墮壞士卒無

仗節死難之意將吏無干城固圉之功望敵驚奔靡有  
鬪志朕初嗣服選建忠良延登宥密之司漸復祖宗之  
故具官某世載忠諒學有本原衛上之忠懇欵七世應  
上之敏勤勞百為屬群寇之內侵罄一心而盡瘁升華  
書殿未究遠猷進二機庭擢司兵柄以宏博無窮之辨  
謀議廟堂之上以剛毅特立之操駕御將帥之臣廸百  
工厲翼之心以尊獎主威鼓三軍情歸之氣以竚衛王  
室服我休命奚俟訓言

監察御史除著作佐郎

御史以言責辨賢佞於一時史官以直筆信褒貶於後世必有剛毅篤實之操輔以雄深辯麗之辭庶兩得之乃克任此具官某行義潔脩志節端亮踐更言職以直諒聞延寘道山復畀舊物按善惡見聞之實撰次第法度之章使後世得以考焉益脩厥官毋愧能言之效

除大學春秋博士

春秋之學廢錮已久習非承誤無識真者矣朕閔古學

之壤選建賓師爾以儒學之茂冠於東南延寘茲選爾其茂明之勿謂游夏之倫尚有不能措一辭遂使區區守一經者至老死而不悟也

除少府監丞

尚方置監天下之高選昔源乾曜一見中上意遂命此官選用之艱蓋自前世爾文辭辨麗譽喧一時占對之初上言治道列職尚方之屬將有試焉勉思古人追配前烈

除秘書省校書郎

中秘仇書極天下豪俊之選異時貴臣用事至參用醫  
卜之流牛驥同群可為太息肆朕初載遴柬儒術之英  
爾以文藝有聞首寘茲選進與群髦之列益觀未見之  
書三篋已亡且詢安世勉思刻厲將有試焉

除大理寺丞

廷尉天下之平而獄者萬民之命朕躬垂明聽不忍註  
誤之民陷於大罪故慎柬良吏其務平之爾得與茲選

其明察寬恕無縱吏謾以羅元元之不逮稱朕意焉

除吏部侍郎

朕惟名器不可假人爵祿所以厲世流品清濁各有攸歸不次而用賢能雖一日九遷不以為疑積日而叙勤勞則差之毫釐勢有不能得廼者官不宿業吏操其柄賢愚同滯昧謝紛然敷求哲人以靖流弊具官某事朕初載以直諒聞首斥奸諛不憚彊禦代言西掖追還正始之風給事東臺茂著論思之効踐揚茲久譽處衆休

天官四銓綱目猥并往二太宰益脩厥官手疏盤錯之  
煩力去留難之吝時維稱職汝往欽哉

給事中除禮部侍郎

宗伯典朕三禮實兼伯夷后夔之事國有大議罔不責  
成然奸諛便文俗學似古不有君子其何能國故雖籩  
豆司存之守而有樽俎折衝之功具官某為老成人以  
儒術用代言西掖辨麗有作者之風給事東臺練達通  
當世之務服休滋久考績應遷進陟文昌位次八座必

能居經持論恪奉典常玩敵人於甘寢秉羽之間制功  
臣於醉呼擊柱之際則上下相守而國自安永肩一心  
以稱朕命

奏狀

與宰臣韓琦等議濮安懿王合行典禮狀

伏以出於天性之謂禮雖以禮制事因事適宜而親必  
主於恩禮不忘其本此古今不易之常道也伏惟皇帝  
陛下奮乾之健乘離之明擁天地神靈之休荷宗廟社

稷之重即位以來仁施德浹九族既睦萬國交歡而濮  
安懿王德盛位隆宜有尊禮陛下受先帝命躬承聖統  
顧以大義後其私恩慎之重之事不輕發臣等忝脩宰  
弼實聞國論謂當考古酌禮因宜稱情使有以隆而廣  
愛庶幾上以彰孝治下以厚民風臣等伏請下有司議  
濮安懿王及譙國太夫人王氏襄國太夫人韓氏仙游  
縣君任氏合行典禮詳處其當以時施行

論兩府遷官狀

右臣伏見因進用宰臣韓琦等凡兩府之臣盡遷一官  
臣愚不明大體未識所謂竊恐從此相承遂為故事凡  
公卿者百吏之表率今公卿方以百吏凡冗思革其弊  
而公卿無故一切遷官將何以使三百赤芾受爵不讓  
者有所愧心哉况慶厯中陛下以數月不雨執政之臣  
皆降一官以答天戒今歲月蝕地震江河汎濫橫流烈  
風淫雨賊傷五稼四方之民墊溺流餓不可勝紀比於  
慶厯災害尤衆而兩府大臣無間新舊皆被褒遷殆非

所以仰承天心下慰衆人之意也竊計大臣當此之時亦必不敢受無名之賞伏望陛下因其辭讓內惟樞密使副不可以給諫及郎中為之者依舊制外其餘皆不遷官以養大臣廉恥之節無使之負謗於海內則其為德澤愈厚矣

論燕飲狀

右臣等竊見今歲以來災異屢臻日食地震江淮騰溢風雨害稼民多菜色此正陛下側身克己省禮審樂之

時而道路之言陛下近日宮中燕飲微為過差賞賚之費動以萬計耗散府庫調歛細民况酒之為物傷性敗德禹湯所禁周公所戒殆非所以承天憂民輔養聖躬之道也陛下恭儉之德彰信兆民議者皆以為後宮奢縱務相誇尚左右近臣利於賞賚陛下重違其請屈意從之夫天以剛健為德君以貞固為事奈何徇後宮左右之欲上忽天戒下忘民病中不為宗廟社稷深自痛惜臣等愚惑竊為陛下不取伏望陛下當此之際悉罷

燕飲安神養氣後宮妃嬪進見有時左右小臣賞賚有節及厚味腊毒之物無益奉養者皆不宜數御以傷太和乃可以解上天譴告之威慰元元窮困之望保受命無疆之休天下群生不勝幸甚臣等區區納忠惟陛下裁察

乞懲勸均稅狀

右臣奉先勅與三司同共詳定均稅已立條約下諸路監司行去訖竊以為國家凡欲立事當先使賞罰明白

然後事無不明伏見職方員外郎秦植前通判德州事均五縣稅皆得平允並無人戶詞訟君與庸愚之人煩擾敗事同歸常調一等殿最則能吏懈體必無成功伏望朝廷察其勤瘁優加酬獎并其餘均稅官吏隨其功過量行懲勸則將來覩之無不盡力矣

奏劄

乞經筵訪問上殿劄子

臣以駑朽得侍勸講竊見陛下天生好學孜孜不倦然

於經席之中未嘗發言有所詢問臣愚意陛下欲護群臣之短恐有應對之際倉卒失據不能開隙稠人之中受其愧怍此誠聖心仁恕之極群臣捐軀無以報塞然臣聞易曰君子學以聚之問以辨之論語曰疑思問記曰有弗問問之弗知弗措也有弗辨辨之弗明弗措也以此言之學非問辨無由發明今陛下若能默而識之不加詢訪雖為臣等疎賤之幸竊恐無以宣揚經旨裨助聖性伏望陛下自今經筵或有臣等講解未盡之處

乞賜詰問或慮一時記憶不能脩者許令退歸討論次日別具劄子敷奏庶幾可以補稽古之志成日新之益取進止

乞延訪羣臣劄子

臣聞天尊地卑道之常也而周易乾下坤上謂之泰者言人君降心以接下人臣竭忠以事君然後上下交而其志成也若人君驕亢以自尊人臣怠慢以自疎則上下之情不通而否道成焉是以孔子語舜之徒曰舜好

問而好察邇言其斯以為舜乎竊見祖宗之時閒居無事常侍從近臣與之從容講萬事至於文武朝士使臣選人凡得進見者徃徃召之使前親加訪問委曲詳悉無所不至所以然者一則欲使下情上通無所壅蔽二則欲知其人能否才器所任是以黜陟取舍皆得其宜太平之業由此而致恭惟陛下潛德藩邸踰三十年一旦龍飛奄有四海雖聖質英睿得於天縱然與當世士大夫未甚相接民間情偽未甚盡知臣謂宜詔侍從近

臣每日輪一員直資善堂夜則宿於崇文院以脩非時  
宣召若有故請假則與以次官互換直宿其餘群臣進  
見及奏事者亦望聖聰稍鮮嚴重細加訪問以廣聰明  
裨益大政取進止

## 第二劄子

臣先曾上言乞詔侍從近臣每日輪一員直資善堂夜  
則宿於崇文院以脩非時宣召有事故請假則與以次  
官互換入宿以開廣聰明裨益大政至今未聞施行蓋

陛下謙謹以皇太后同聽庶政未奉慈旨不敢擅召群臣與之議論今皇太后盡以四海之事歸於陛下出入起居願指如意臣是以敢重申前說乞少加采擇凡人牆之外目不見也里之前耳不聞也而天子奄有四海一日萬幾之憂樂萬事之本末雖有聰明睿智之性若不問之於人何從知之是以太祖太宗雖起於側微猶日孜孜訪問群下至於小臣卒伍所間絕故能綱紀四方創業垂統陛下生為帝王子孫未嘗歷試於外天下

之事豈能細知况先期置直學士待制等職以為侍從之臣若使之不得朝夕在左右脩顧問將安用之所有每夜於崇文院輪宿自是舊制近年以來因循隳廢舉而行之有何所難伏望聖慈檢會臣前所奏劄子內事節特進施行取進止

乞建儲上殿劄子

臣先於至和三年通判并州日三曾上言乞陛下早定繼嗣以遏亂源當是之時臣疏遠在外猶不敢隱忠愛

死數陳社稷至計况今日侍陛下左右官以諫為名竊  
惟國家至大至急之務無有如此若捨而不言事以冗  
細之事煩浼聖聽厭塞職業是臣懷奸以事陛下罪不  
容蘊醢伏望陛下取臣向日所進三狀少加省察或有  
可取則斷自聖志早賜施行如此則天地神祇宗廟社  
稷群臣百姓並受其福惟在陛下下一言而已取進止

乞建儲上殿第二劄子

臣近於前月二十六日上殿敷奏乞檢會臣并州所奏

三狀早定繼嗣事陛下聖意昭然即垂聽納凡所宣諭  
皆非愚臣所能及乃天地神祇保佑皇家寶萬世無疆  
之休也臣所能言陛下朝夕當發德音宣告大臣施行  
其事今近一日未有所聞豈陛下以茲事體大慎選宗  
室未得其人將左右之人有間阻熒惑聖聽臣皆不得  
而知也臣聞為之後者為之子者也於禮律皆有名文  
漢孝成帝即位二十五年年四十五以未有繼嗣立弟  
子定陶王欣為太子今陛下即位之年及春秋皆已過

之豈可不為宗廟社稷深思遠慮哉某今亦未敢言正東宮之名但願陛下自擇宗室仁孝聰明者養以為子官爵居處稍異於衆使天下之人皆知陛下意有所屬以係遠近之心矣他日皇子生復使之退歸藩邸有何所傷此誠天下安危之本願陛下決意而速行之取進止

言施行封事上殿劄子

臣伏以大舜舉賢敷納以言明試以功漢武帝詳延特

起之士待以不次之位終獲其用威加胡越真宗皇帝  
總覽群臣章奏用其言而顯其位以成咸平景德之治  
凡察言所以知人知人所以立政自古及今其道一也  
今陛下即政之初有開言路令中外臣民皆得上封事  
海內欣幸咸畢精竭思以承休德若於此際能采其嘉  
謀舉其賢才而用之則太平之基可指日而望也若徒  
備外飾廢其言而不用棄其人而不取則天下頽弊之  
事當何時而振起乎臣與張方平生受詔詳定中外所

上封事所以盡心料簡合於理義可施行者一一奏聞  
更望陛下擇其精者決自聖意必令行之其有識慮稍  
出於衆者願陛下特賜召對面加詢訪考其虛實果有  
可采密籍姓名遇有差遣隨材受任俟其實有顯效然  
後可以不次拔擢如此則嘉言罔攸伏野無遺賢矣

除中丞上殿劄子

臣聞澄其源則流清固其本則末茂臣蒙陛下聖恩拔  
於衆人之中委以風憲天下細小之事皆未足為陛下

細言之取先以人君脩心治國之要為言此誠太平之原本也臣聞脩心之要有三一曰仁二曰明三曰武仁者非嫗煦姑息之謂也脩政事興教化育萬物養百姓此人君之仁也明者非煩苛伺察之謂也知道義識安危別賢愚辨是非此人君之明也武者非強亢暴戾之謂也惟道所在斷之不疑奸不能惑佞不能移此人君之武也故仁而不明猶有良田而不能耕也明而不武猶受苗之穢而不能耘也武而不仁猶知穫而不知種

也三者兼脩則國治強闕一焉則衰闕二焉則危三者無一焉則亡自生民以來未之或改也治國之要亦有三一曰官人二曰信賞三曰必罰夫人之才性各有所長官之職業各有所守自古得人之盛莫如唐虞之際然稷契臯陶垂益伯夷夔龍各守一官終身不易苟使之更來迭去易地而居未必能盡善也故人主誠能採天下之英俊隨其所長而用之有功者勸之以重賞有罪者威之以嚴刑譬如乘輕車駕駿馬總其六轡奮

其鞭策何往而不可至哉昔仁宗皇帝之時臣曾進歷  
年圖又以此語載之後序今幸遇陛下始初清明之政  
虛心下問之際臣復以此語為先者誠以臣平生力學  
所得至精至要盡在於是願陛下勿以為迂濶試加審  
察若果無可取則臣無所用於聖世矣

五百家播芳大全文粹卷五十一